

Omosexuals duain dar sang mo sch'els desistan da sex

La chombra pitschna refusa ina midada

■ (sda/anr) Dapi il fanadur dastgan umens omosexuals dar sang. La cundiziun è ch'els han in onn betg gi sex cun umens. Il cussegl naziunal less abolir questa restricziun, ma il cussegl dals chantuns è encunter. Cun 22 cunter 17 vuschs ha el decidì ier da refusar ina moziun da la partida burgais-democrata (pbd). Quella saja vegnida inoltrada cura che omosexuals sajan anc stads exclud dal tuttatfatg dal dar sang, ha ditg il pledader da cumissiun *Konrad Graber* (pcd/ LU).

Dapi lura haja l'institut per medischna swissmedic pretendì ina adattaziun. La stad passada hajan ins lubì il dun da sang dad omosexuals sut la cundiziun ch'els n'hajan gi nagin sex cun umens ils ultims dudesch mais.

Decisiv saja il cuntegniment da ristg e betg l'orientaziun sexuala, ha explitgà Graber. Era las dumondas ch'ins stoppia responder avant che dar saun na sajan betg discriminantas. Quellas sa drizzian a tuts donaturs e servian a la segirtad da las personas che retschaivian il sang.

Liliane Maury Pasquier (ps/GE) è stada d'in auter avis. Sex tranter umens en ina relaziun stabila na muntian nagin ristg, ma mainia tuttina ad ina exclusiun, ha ella ditg. Quai ha confermà era *Claude Janiak* (ps/BL). El viva en in partenadi registrà. Tuttina na dastgia el betg dar sang, malgrà che sia gruppa da sang tutgia tar las pli tschertgadas.

Il cussegl federal era s'exprimì encunter la moziun. Tenor il minister da sanadad *Alain Berset* sustegna el dentant da schlucar il scumond sche la segirtad dals retschaviders da sang è garantida. Per gliez na dovria quai nagina midada da la lescha. Berset ha intimà l'organisaziun per duns da sang da differenziar anc meglier ils criteris d'exclusiun per evitar discriminaziuns.

Cura che la malsogna aids era cumparida, eran tuts umens che avevan gi sex cun umens vegnids exclud dal dar sang. La pbd ha fatg attent en sia intervenziun sin las stgarsas reservas da sang e ch'ins vegnia perquai adina puspè en las stgretgas.



Dapi il fanadur dastgan umens omosexuals dar sang. La cundiziun è ch'els han in onn betg gi sex cun umens. Il cussegl naziunal less abolir questa restricziun, ma il cussegl dals chantuns è encunter.